

Klaba va vegedunaveem koe witafa golera

Bak bata 21^{-eafa} decemda, akoyepesa klaba tir.

Mali mon 150 tanda, jontik rietavik va yona warzafa ava reduyud ise drageyed, enide tana va pelafa golerava wal kote sane ke Tawava zanudar, va ava novesa va mialodafa is miltafa golera isu dokalira pu kottan ke yona amidafa araya, meviduson va ava ke felis seltay.

Batlize va riwe teniskafa vexala dem bat abumimaks me fu ozwatá, dem lodekemaf ik lotestaf. Ise bata vexala tandatandon dun tulodabrotcawer, dumede jonsanayana drikaca ke brubeopa is wita rotisaceem ta dokalira sopuyud, dum brayarsafa tawa tove jontik avopaf ravesik iku vulegas yambik. Soe, vanmie konak decemoy abumimaks leon ok loon bunyeyen, va abic gogrupet : va telyon loon kalskuyun isu bitonaf isu tuseramayas. Kle ozwá :

- **Esperantoava** : arse tela vegegunava loon jupekayasa mali redura bak 1887 gan L- Zamenhof. Rotir celemoy avusik, dem dace gadavaf konaktan. Aotceks va Latinava is abica europafa ava, moe vertapaf pulviropaf bolc.

- **Volapukava** : guazaf abumimaks sedielon jupekayas arti 19^{-eafa} decemda. Awalkaf, kore abic rilitik ware dile dulaped.

- **Idoava** : reduyuna bak 1907, solpeks sol Esperantoava. Lotuwavafa ava. Nutir tuiapawesa, damo rotir decitoy avusik oku tol-decitoy.

- **Interlinguava** : abumimaks ke 1950 sanda, djutis tuwavapaf, vixarinda va romanaveem. Tce dure tela toleafa vegegunava kadime Esperantoava, rotir 3000 avusik iku 5000. Nunubagiwer.

- **Occidentalava** is **Novialava** : toloy abumimaks ke 1920 sanda, walefa gu Esperantoava is Interlinguava. Abic avusik dene kottol.

Edeme, vanmie yon lowitaf is tidfis abumimaks, tid :

- **Kotava** : reduyuna bak 1978. Tolpulviti.

- **Lojbanava** : reduyuna bak 1987, opafa is solokseropafa aneyara rigavayana mo Sapir-Whorf sazara. Maletiks : ovopapafa ava, vols vanstana gan kon opelik, is xayepesa golde intafa envara lidamu pulviropa lidamu naken ravlemeem, kore mo yon ravlem ke aluboya lozolonafa tuwavava va int zober.

- **Lingua Franca Nova** **ava**: reduyuna bak 1997. Lekon milswavafa gu Interlinguava, vox dum kona « kreol » ava ke romavaveem. Sedme jin, lokiewapon kiewaskiyina. Va tegirafa is poafa dodama dadir, dem rotir 50 ik 100 usik.

- **Tokiponava**: reduyuna bak 2001 gan canadafa avopikya (dum Staren). Tir dulapapafa bagala rigavayana mo vugarsaf « a priori » ravlemeem. Luntaf mambolk, voxe ava nutir axarsafa ta muxara va mantaf olegareem va golera is dokalira. Va satcafo kro nuve al zo kazawar, nelkon vanmiau esperantoavikeem (lece Tokipona me co-rotir gorestaf milgrabik, tce).

- **Lingwa de Planeta** **ava**: reduyuna bak 2007 gan yon rossiaf avopik. Ava bourgon ice Occidentalava is Novialava, vox tumantasa va intaf ravlemkliteem gu konaka tamavafa meeuropafa avapa (Arabava, Siniava, Xindiava). Cunkaf maletiks. Bat abdimmaks va tegiramafa dodama nuve dadir, dem rotir 20 ik 30 avusik.

Va konakara sanoya vege dunava co-rotozwá (dace mepulvison va Klingonava ik yona « elfic » ava ke Tolkien, dana va elpatind ik yambind loon pasud), vexe, jinon grupenon, meka va ivamumu dem toloy ok baroy avusik valem redusik loote dadir.

Vanmiae 11 tideon divrozayana ava (6 savsafa is 5 noeltafa) :

- 7 (Esperanto-, Ido-, Occidental-, Novial-, Interligua-, Lingua Franca Nova-, Lingwa de Planeta-) tid « a posteriori » ava, nelkon rigavayana mo konaka europafa ava, luxe ravlemeem lidam pulviropa ;

- 2 (Volapuk- is Lojban-) efe tid vey mil kliteem, voxe zo grituwavapayad eke gluyara is kavaniksantura tid voldrikafa ;

- 2 (Kotava is Tokipona-) tid « a priori » ava, moe mulafa wavidaca gu tanuskuca is envarafa volruptesuca.

Nume va bata tan-sanoya ava pintason al dulapé. Toka inafa bliuca, isu doda, isu tigira, isu golera, isu deraykan robeem, ikz- tid ?

Batlize, va rigotaca nuve gotolkalí, edeme meka vege dunava va tiralazava co-dikir : mukot tir da ina va mialodafi golesiki wal saneem di rozanudar. Oyeon, mana ava tire tir rontion elicafa is volsapafa gu yona noelafa felisa avapa, gu telyona ke mofelisikeem va tamava, gu keon taneemon Englava.

Voxe bateke tir kevkalirapa daktena koe vergumvelt.

Mali mon sanoya tanda, sold ke vuropa is internet al tid glebas, askison gu tamava va widapa riwe kotlizu kotvulon vansana, novesa da loloon jontiktan rontion rogoled, deraykason va riwe lumiskafa givaflava. Kottan art tamava vulegamason is kotliz femlayeson rodokalir.

Lotegirafa doda va rosaven dulapap al gildad, va int tigison ko bata poaca is batinde voneson va intafa konedira ta dulapara va yon warzaf avusik. Batinde Esperantoava va bata artowara nuve al sulenyer nume va warzafa gandira gruper. Jontiko internetxo isu dokalixo isu xadola isu gedraf rob vaon ektudad.

Arkon, ara vevedunava va int dere konedid, ekon gu pouca ke intaf bewikeem isu tegiruca. Kota cugeke lagoler ise va yon warzaf avusik kotliz koe tamava muon lawar. Voxe tokinde dioted ?

Kan Englava goled !

Ex en ! Batse klabapa ke rupa ! Bata vevedunava ~ ke dana fintan mukot is dace tiralazava tid firvira va tamavafa okaca gu kalfelira ke ginevafa is tanarayafa ava ~ va zanudara va Englava anton trasid enide di gan cugtan zo gruped ! Nume arse batkane va inafa mofelira ware loon tupoad ise va merodolunyena dusiva pu cugtan etrakas va dulapans va pelafa vevedunava wal walvedeyaf zilikevereem jontikote zilid. Nume rabatec ! Dace miltan malyopas va yorda ke Englava tid taneaf gu vaon kofavera is batinde wazdera va exaksunafa dulapuca ! Mana lokiewafa danedira kan solove !

Va coba opelon disuket :

- Esperantoava : pof gu dodapa tigisa koe jontika patecta, kotavusikeem riwe tir antaf melubes ko bat remok is bolkon gogolas va rontifa dokalira esperantoavuson ok, ledamon, kan vedeyafa ava ke kottan ;

- Idoava : nelkon voneweyesa koe Europa (Germana is Franca ikz-) ; favera va Englava soe tir nobapafa ;

- Volapukava : bolkafa favera va Englava wal abictan wan dulapes ;

- Interlinguava : yona sugara ta avusa golera, vexe otapa dem avusik koe Scandinavia patectem isu Anglo-Saxona jupar da jontiktan englavuson goled ;

- Occidentalava is Novialava : bolkafa favera va Englava ;

- Lojbanava : reduyuna gan yon amerikik. Riwe antafa favera va Englava. Lojbanava batinde nutir rietovafa is avopafa ura lodam golesiki wal saneem is olkikeem ;

- Lingua Franca Nova ava : reduyuna gan amerikik. Purafa sugara nuve tir enide ava me di zavzar kimena dene « anglo-saxon » tamava, vexe tire lok ke konedira tir englavus, nume pakon inafa merofrayena zolonuca ;

- Tokiponava : golera kan nelkon Englava ik ... Esperantoava. Mek zolonaf kaltokiponavaks mei jontik jonavaf rob ;

- Lingwa de Planeta ava : reduyuna gan yon rossiaf avopik, narara ta golera van tamava tir Englava, lodam dace Rossiava ;

- Kotava : antafa vegedunava ~ do Esperantoava yoke inafa otafa pouca ~ melubesa ko remok va rigavara va intafa golera kan Englava. Va batcoba pintá :

Me dimnarison va foliradakteks wetipon askiyin gan Staren Fetcey ~ redusik va Kotava, ~ afton gotuyus va orka is vefakieem, anton rotolkalit da **MUKOT** ke pelafa vegedunava ta walvedeyafa golera tir, oke gotir, novera da kottan milton avopon is arayon rodokalir, nume ava di tir ikabetasiki va Englava, va noelafa ava ke skapafa is arayafa kalfelira va tamava. Kotaf ark anton tir pulvidaraja ok, ledamon, listafa funtera is gruadafa relandera.

Kle, mana ava is intaf rojusikeem gonid da ko gunafa drikaca lasumelubed, ko tela ke kottan fogetis « witaf » is urmaf, ko tela askisa da kontan gestir da uneson va « ervo ke oretlik » vaon rodelyumar. Me batse va int abduaskison kan Englava, kona ava nijur rofolina ise rokiever da ina zo gojovler enide bata lomialodafa ava ikaon zo vanikatcur. Bata rofolinuca kan gronafa favera isu sugara ta muxara kan tela vegedunava anton rotukramawer, ik edeme, goleson kan kona toleodafa tuwavava ta loeke tugrupenara va ina. Englava tir tel grabasikap : favera va ina, batse mirembara va int.

Luxe Kotava, rowivepet da batmil nelkot gan lo avusik zo pakad. Divafa englavusa golera tir abicafa, jontikeke ikapina gan tela francavusa ik espanavusa ik italiavusa ik lingalavusa ik turkavusa. Ostik, koefa dokalira miv kotavuson tid zolonapafa ; sugara ta kalkotavara is warzera va yon krent iku tanuskaf grabom tandatandon laumad. Batinde, kotavusikeem tir ensapaf ise va intafa joya kaltrenar, nekev etrakasuca ke ezeon jontiktan is jontikviele sokisa keveluca.

Trovgay ke bata rietovafa tirka tir da Kotava, vanmieae kotyona vegedunava kublon gu pelafa golerava, tir tela lekonedina is lewonayana, damo intafa ageltafa is tegirafa doda (mon 100 vwanyakiraf avusik, keon mon 20 vwapakiraf) is gedraf is jontik warzeks. Tove jontiktan, koncoba mewonana kan Englava tire me krulder ! Batcoba tir lofa danedira va skapafa is arayafa antoka gina gan « anglo-saxon » tamavikeem. Nume Kotava gan yon englavusik ae bolkon zo oblar ise zo kevpulviyir. Sin va inaf volsaf rietovaf kiblakseem al gildapad. Tula va bata keveluca jontikote tid.

Battode, va Wikipedia dokobarafa xadolapa rotozwá. Koe englavaxoki ektuni gu vegedunaveem, konakviele bak yona ironokafa tanda, teliz icde Kotava, dem soe mukodapaf is xadolakoraf cek, bolkon zo sulayad, daskison da Kotava tir tela antafa vegedunava dadisa va ISO winugafa beksa (*avk* mali 2007) vols tigisa, kore jontik testaf ik sanegiskaf abdumimaks (vox reduyun ok stedan gan englavusik) aultoved.

Batcoba va rieta tupoapar da kotavusikeem va intyona xeka isu xo is gort volstopre artan wan govoner, kore zavzar grupensen gan yontan metis rilifaf gu aneyara losumon dam potcaf taneodaf englavaf robeem. Duga lodam rolafa tokoda sozilidur.

Moekote viele, va tarkara va vonaf ajevaf rieteem vixayan gan Staren Fetcey ko tanaf norlaf reduks vas Kotava, kottan lotir.

Wetce zoltera icde bata vartafa klabo va jontika vegeedunava ta inafa golerinda do tamava is inafa abduaskirinda, tit oklaf da Kotava tir ke batyona ava tela antafa (ok riwe) melubesa ko iksepe zoriane gan Englava is uldinejene gan trelawis dolebelopikeem.

Bruxelles, ba 18/10/2012.

Pierre van Moorgen